

山西通志卷第九十一

山西巡撫都察院右副都御史臣覺羅石麟奉

旨修輯

名宦九

潞安府

周

靳黈趙上黨守也秦伐韓一軍臨滎陽一軍臨太行韓請効
上黨之地以和令韓陽告靳黈曰秦起二軍臨韓韓不能
支今王以上黨入和於秦使陽言之太守太守其効之黈
曰人有言挈瓶之智不失守噐王則有令而臣失守雖王
與子其亦猜焉臣請悉發守以應秦若不能卒則死之韓
陽趨報王王曰吾始已諾應侯矣今不與是欺之也乃使

馮亭代薨

漢

任敖故沛獄吏高祖東擊項籍敖遷爲上黨守陳豨反時敖堅守封爲廣阿侯食千八百戶高后時爲御史大夫三歲免

蔣滿宣帝時爲上黨太守子萬爲北地都尉並以卓異徵萬退却不敢並父帝問贊謁者以父子對帝歎息曰乃父子剖符耶卽下詔曰上黨守滿經行篤著信行山東其以滿爲淮陽王相誨導東藩宏農股肱郡其以萬爲宏農太守同日拜擢一時榮之

苟諫爲上黨太守哀帝時王莽欲滅鮑宣子孫都尉路平承望風旨規欲害宣子永諫擁護永召以爲吏常置府中永

因數爲諫陳興復漢室翦滅篡逆之策諫每戒永曰君曩
幾事不密禍倚人門永感其言及諫卒自送喪歸扶風路
平遂收永弟升後太守趙興到歎曰我受漢茅土不能立
節而鮑宣死之豈可害其子也出升復署永功曹

田邑字伯玉馮翊蓮勺人有大節涉學藝能善屬文更始初
爲上黨太守二年與行大將軍事鮑永狼孟長馮衍繕甲
養士扞衛并土而尤善馮衍及世祖卽位遣宗正劉延攻
天井關邑連戰十餘合延不得進邑迎母弟妻子會鄧禹
使積弩將軍馮愔將兵擊邑愔與延悉得邑母弟妻子後
聞更始敗乃遣使詣洛陽獻璧馬降帝遣騎都尉弓里游
諫大夫何叔武卽拜爲上黨太守屢以書招衍衍不從
永婿張舒誘降涅城舒家在上黨邑悉繫之遺永書曰張

舒內行邪孽不遵孝友疏其父族外附妻黨已收三族將行其法能逃不自詣者舒也能夷舒宗者予也永不答自是與邑有隙而永衍後亦罷兵幅巾降邑遷漁陽太守未至官疾徵還爲諫議大夫卒

班稚長子令彪之父有善治

戴涉建武初爲上黨太守太行山中有劇賊涉聞鮑昱有智略乃就謁請署守高都長昱平羣賊道路開通

魏應字君伯任城人習魯詩閉門誦習不交僚黨舉明經弟子自遠方至著錄數千人肅宗甚重之時會京師諸儒於白虎觀講論五經同異使應專掌問難明年出爲上黨太守徵拜騎都尉卒

鄭渾字文公河南開封人興之子也建安中爲左馮翊平山

賊轉上黨太守渾爲郡明禁令以發奸勤稼穡以勸農山
是民安而盜賊止息性清素在公卒之日妻子不免饑寒
羊衛泰山南城人續之子也世有清德蔡邕以女妻之衛仕
至上黨太守生祐

晉

郭翼直言上書武帝擢爲屯留令元帝時南昌熊遠䟽論時
政嘗稱引之

呂溫壽張人善書好施有文武才畧拜上黨太守以能稱卒
贈豫州刺史

北魏

鄭渾河南儀封人魏太祖聞其篤行召爲掾後遷下蔡長天
下未定民皆剽掠不念產殖其生子多不舉渾禁其漁獵

重加去子之刑後數有戰功遷上黨太守

韓念祖爲上黨令徐州刺史尉元表念祖始臨之初舊民南叛撫慰招集南來民費侯先等前後歸附戶至二百有餘南濟陰郡睢陵縣人趙伶等辭稱念祖善於綏撫清廉請乞念祖爲睢陵令若得其人必能招集離叛成立一縣獻文詔曰樹君爲民之情如此可聽如請

隋

柳昂字千里河東解人周賜爵文城郡公隋初拜潞州刺史昂見天下無事可以勸學行禮因上表言之上覽而嘉納詔天下州縣皆置博士習禮焉昂在州甚有惠政數年卒

官

辛彥之隴西狄道人周封五原郡公隋初改封任城郡公

遷潞州刺史有惠政卒官諡曰宣

源崇西平樂都人朔方郡公雄子襲封官儀同大業中上黨贊治入爲尚書虞部郎將兵討北海賊力戰死贈正議大夫

唐

王行敏并州樂平人義旗初潞州刺史遷屯衛將軍劉武周寇上黨取長子壺關上遣行敏馳往守禦賊引去

李襲譽字茂實金州安康人唐初封安康郡公爲潞州總管突厥旣和親又通使王世充襲譽掩擊悉斬之因委典運以餽東軍後歷蒲州刺史轉楊州大都府長史所蒞以威肅聞後戍卒

李元嘉高祖第十一子初封徐王貞觀六年授潞州刺史時

年十五在州聞太妃有疾涕泣不食十年改封韓王授潞州都督元嘉少好學閨門修整有類寒素修身潔已內外如一高宗末轉澤州刺史垂拱中徙絳州遇害

李元懿宗室子封鄭王初刺兗州徙潞州數斷大獄務寬平城南有元懿太妃墓

崔珏一名元靖樂平人貞觀間爲長子令廉介公直發奸摘伏民不敢欺時有虎傷人珏祈諸神遣使追虎至而殺之民爲立石頌德

李嗣正字承胄趙州栢人多藝數尤精音律舉明經歷縣令以善政聞永昌初歷拜右御史中丞知大夫事命巡撫河東薦宋溫瑾袁嘉祚李日知授州縣職皆至顯官時來俊臣獄方熾嗣正上書切諫出爲潞州刺史爲俊臣所誣歷

藤州卒諡曰昭

宋璟邢州南和人耿介有大節好學工文辭第進士調上黨尉居官鯁介景雲初以吏部尚書同三品開元四年又以吏部兼侍郎封廣平郡公後罷以尚書右丞相致仕卒贈太尉諡文貞

姚崇陝右人睿宗時以兵部尚書出爲潞州刺史專務德化政條簡肅潞人爲立碑紀之

李濬太宗族子開元中潞州刺史轉劍南節度使所歷以誠信待物稱爲良吏卒諡誠

薛儉字用冲漢御史大夫廣漢後開元間上將巡潞藩擇賢能爲長吏俾宿儲供僅以拾遺宰屯留畧無慍色躬親庶務諸事克辦朝廷稱之次年歲歉出公私米賑活以百萬

山西通志 卷九十一
計又防水患邑大治以異能稱民立碑頌之明正德六年
入祠

程千里本磧西人居京兆天寶十四載詔於河東召募充河
東節度副使雲中太守十五載正月遷上黨郡長史特進
攝御史中丞以兵守上黨賊攻城屢爲千里所敗加開府
儀同三司禮部尚書兼御史大夫至德二載九月賊將蔡
希德圍上黨輕騎挑戰千里恃勇開懸門率百騎欲直擒
希德幾得而救至乃退會橋壞馬顛爲賊執仰首勅諸騎
使還曰爲我報諸將可失帥不可失城軍中皆爲泣下增
備固守賊不能下乃還囚千里至東都爲嚴莊所害後追
褒死難者惟千里生見執不及云

陸長源字泳之吳人乾元中辟昭義節度薛嵩幕府嵩後汰

常從容規切嵩曰非君安能爲此歷宣武軍司馬兵變遇害贈尚書右僕射

魏琚潞州府長史兼御史中丞寶應元年爲大元帥府兵馬使會回紇討賊爲登里可汗榜捶死

王虔休字君佐汝州梁人涉學有武材以信義聞潞澤李抱貞厚幣招之授兵馬使以從破臨洛功擢步軍都虞候封同昌郡王貞元十年抱貞卒元仲經等謀樹其子緘虔休正色語衆曰軍王軍士王士帥亡當稟天子何云云有妄謀衆服其言得不亂德宗嘉之以邕王爲昭義節度大使擢虔休潞州左司馬領留後號令撫循軍中大治二歲遷昭義節度使檢校工部尚書始屬城州縣守宰多署他職不親政故治苟簡虔休增俸廩遣就部人以妥妥卒贈尚

書左僕射諡曰敬虔休性格敏節用度既沒所部帑廩皆
可支數歲嘗得太常樂家劉玠撰繼天誕聖樂因上誕日
以獻焉

盧頊潞澤節度王虔休掌書記軍司馬元誼據潞州虔休破
之復遣頊見誼陳利害誼請朝請卽以頊爲潞州別駕使
守洛

韋虛心京兆萬年人湊子舉孝廉歷潞州都督府長史所在
官吏振肅威令甚舉拜東京留守卒諡正

劉潼字子固曹州南華人暹孫登進士第拜昭義節度使徙
河東所治辦卒贈司空

郝士美字和夫高平金鄉人自潞州從事累拜御史大夫經
畧黔中以平賊功封高平郡公元和六年檢校工部尚書

潞州大都督府長史充昭義節度使昭義自李抱貞以來
皆武臣私厨月費米六千石羊千首酒數十斛潞人困甚
士美至悉去之出廩錢市物自給又盧從史時日具三百
人膳以餉牙兵士美曰卒衛于牙固職也安得廣費爲私
恩亦罷之詔討王承宗大將王獻恣橫逗撓斬以徇下令
曰敢後者斬兵最先有功憲宗喜曰固知士美能辦吾事
十二年以疾徵爲工部尚書卒諡曰景

辛秘隴西人舉五經歷河東司馬元和十二年代郝士美爲
潞州大都督府長史御史大夫昭義節度澤潞磁洛邢等
州觀察使時以再討王承宗澤潞壓境凋費尤甚秘在鎮
四歲約出入嗇用度府庫積錢十七萬緡糧七十萬斛器
械堅良復爲完鎮家無豐財厚產爲時所稱召還卒贈左

僕射諡曰昭

薛茂卿潞州將剽勇善戰謀歸王宰爲劉稹所殺稹誅詔贈博州刺史

沈詢吳人第進士咸通中檢校戶部尚書潞州長史昭義節度使治尚簡易人皆便安奴結牙將夜攻詢滅其家贈兵部尚書以左散騎常侍劉潼代爲節度馳至剽奴祭詢

孫揆字聖圭潞州涉縣人第進士累拜京兆尹昭宗討李克用爲招討副使更授昭義節度使以本道兵會戰克用伏兵刁黃嶺執揆厚禮將用之曰公輩當從容廟堂何爲自履行陣也揆大罵不詘克用怒使以鋸解之鋸齒不行揆謂曰死狗奴解人當束之以版汝輩安知行刑者如其所言詈聲不輟至死昭宗憐之贈左僕射

李殷銳爲潞州刺史李克用寇潞州殷銳與昭義節度使康君立俱死之

王中立榆社人潞州節度使竭心力於王室著勞績於戎行內外稱之

李克修字崇遠國昌子從討龐勛以功拜朔州刺史兄克用鎮雁門爲奉誠軍使後表昭義軍節度使數出山東擊孟方立又與李罕之攻懷孟克用自將擊方立還軍過潞供饋甚薄克用怒詬而笞之克修慙憤發疾卒克修爲人簡儉潞人素安其政其卒也人皆哀之

李嗣昭太谷縣人天祐三年攻降潞州爲昭義軍節度使梁遣李思安將兵十萬攻潞築夾城以圍之朱溫常遣人招降嗣昭嗣昭斬其使者閉城拒守踰年莊宗始攻破夾城

嗣昭完緝兵民撫養甚有恩意

後唐

盧文進范陽人明宗時以上將軍出鎮潞州擒奸恤隱甚得時譽

任圜京兆三原人明敏善談辨李嗣昭節度昭義辟觀察支使梁兵築夾城圍潞州踰年而晉王薨晉兵救潞者皆解去嗣昭危甚問圜去就之計圜勸嗣昭堅守以待不可有二心已而莊宗攻破夾城聞圜爲嗣昭畫守計甚善之由是益知名其後嗣昭與莊宗有隙圜數奉使往來辨釋讒構嗣昭卒免於禍圜之力也嗣昭戰胡柳擊敗梁兵圜頗有功嗣昭戰沒於鎮州圜代將其軍號令嚴肅遷節度判官召還後拜同中書門下平章事致仕安重誨矯制殺之